

ԲԱՆԱՎԵՃԵՐ ԵՎ ՔՆՆԱՐԿՈՒՄՆԵՐ ДИСКУССИИ И ОБСУЖДЕНИЯ

ԽԱՉԱՏՈՒՐ ԱՐՈՎՅԱՆԻ ԾՆՆԴՅԱՆ ԹՎԱԿԱՆՔ

Վ. Ջ. ՂԱԶԱՐՅԱՆ

Աբովյանի ծննդյան թվականի ճշտման բարդության հիմնական պատճառն այն է, որ նրա ծննդավայր Քանաքեռի եկեղեցիների չափաբերական մատյանները (որտեղ պարտադրաբար գրանցվում էին ծնունդ, ամուսնություն և մահ) չեն պահպանվել: Հարցի բարդացմանը նպաստել է նաև Աբովյանի ծնողների՝ իրենց անդրանիկ որդու ծննդյան թվականը ստույգ չիմանալու հանգամանքը, որի հետևանքով ինքը Աբովյանը ևս իր տարիքի մասին մոտավորապես է իմացել: Այդ է եղել պատճառը, որ նա իր ծննդյան թվականի վերաբերյալ այլևայլ առիթներով տարբեր վկայություններ է թողել:

Այդ բոլորին ավելացել է Աբովյանի առաջին կենսագիրների անփութ վերաբերմունքը ծննդյան թվականի վերաբերյալ: Այսպես, նրա առաջին կենսագիր Մ. Տեր-Ավարյանը գրել է. «Խաչատուր Աբովյանի ծննդյան տարին մեղ հայտնի չէ: Ծննդարիտ է, նրա 1846 թ. ծառայության ցուցակը ցույց է տալիս, որ այս թվումը նա եղել է 36 տարեկան, և երևում է, որ նա ծնվել է 1806 թ., սակայն չեմ կարող երաշխավոր լինել սրա ստուգության համար»¹: Փաստորեն Տեր-Ավարյանից է սկսվել Աբովյանի ծննդյան թվականի շփոթը, քանի որ նրա ձեռքի տակ եղած աղբյուրը՝ 1846 թ. ծառայության ցուցակը մատնանշել է ոչ թե 1806, այլ՝ 1810 թ.:

Աբովյանի երկրորդ կենսագիր Ն. Տեր-Կարապետյանը, հիմք ընդունելով Աբովյանի իր մասին ընդհանուր ձևով գրած այն վկայությունը, թե «1804—5-ին ծնվեցա ես Քանաքեռ գյուղում», գտնում է, որ Աբովյանը ծնվել է 1804—1805 թթ.²:

1914 թ. «Խ. Աբովյանի կյանքի վերջին հինգ տարիները» հոդվածում Ա. Դո-ն, առարկելով Տեր-Կարապետյանին ու Տեր-Սարգսյանին, ինչպես նաև 1811 թ. առաջարկող Ալեքսանդր Երիցյանին, Աբովյանի՝ 1847 թ. կազմված ծառայության ցուցակը համարելով «ճշտագույնը այն բոլոր տեղեկություններից, որ լույս են տեսել Աբովյանի մասին», առաջարկեց 1809 թ.³:

1939 թ. երեք ուսումնասիրողներ՝ Ռուբեն Զարյանը, Հրայր Մուրադյանը և Արամ Երևմյանը նույնպես պնդեցին, որ Աբովյանը ծնվել է 1809 թ.⁴: Նույն թվականին, բայց 1938 թվակիր «Հայ հանրագիտակի» (Պուկրեշ) հա-

1 Մ. Տեր-Ավարյանց, Մեկ քանի խոսք Ապովյանի վերա, «Կոտեյկ Հայոց աշխարհին», 1861, թիվ է, հուլիս, էջ 531—553:

2 Տե՛ս Ն. Տեր-Կարապետյան, Խաչատուր Աբովյան, ճեմարանական դիսերտացիա, Տփղիս, 1911, էջ 14—15:

3 Տե՛ս «Նոր հոսանք», 1914, № 5, էջ 759: «Գործ», 1917, № 5—6, էջ 32—33:

4 Տե՛ս Ռ. Զարյան, Խաչատուր Աբովյան, Երևան, 1939, էջ 8: Հ. Մուրադյան, Խաչատուր Աբովյան, Երևան, 1939, էջ 8: Ա. Երևմյան, Գրական-պատմական անճշտություններ, «Հայաստանի կոչնակ», 1939, № 32, էջ 767:

վելվածում, Մկրտիչ Պոտուրյանը, հենվելով Արամ Երեմյանի հոդվածին, Աբովյանի ծննդյան թվականը դարձյալ նշում է 1809 թ. (էջ 511):

1945 թ. լույս տեսած «Խաչատուր Աբովյանի կենսագրությունը» ուսումնասիրության մեջ, բաղմավաստակ աբովյանագետ Երվանդ Շահազիզը, վերակրկնելով Ն. Տեր-Կարապետյանի վարկածը, Աբովյանի ծննդյան թվականը համարում է 1804—1805 թթ.:

1948 թ. ՀՍՍՀ ԳԱ Մ. Աբեղյանի անվան դրականության ինստիտուտը, դրական-բանասիրական հետազոտությունների երրորդ գիրքը նվիրեց Խ. Աբովյանի «անհայտացման» հարյուրամյակին: Այստեղ պրոֆ. Դ. Աբովը, քննադատելով 1809 թ. առաջարկած Ա-Դո-ին և նրան պաշտպանող Ռ. Զարյանին, հայտարարում է, որ Աբովյանի «ծննդյան միակ «հավանական» և ճիշտ թվականը 1804 կամ 1805 թվականն է: Այս երկու թվականից ամենից ավելի ձգձարտացին պետք է համարել 1805-ը»⁵: Որպես իր առաջարկած 1805 թ. հիմք, բանասերը վկայակոչում է էջմիածնի Սինոդին 1838 թ. տված խնդրագիրը և նիկոլայ I-ին գրած դիմումը և ինքնակամ հաշվումներով ստանում 1805 թ.⁶: Սակայն այն աղբյուրները, որոնք Աբովը վկայակոչում է, իրենց մեջ պարունակում են փաստական անճշտություններ: Այսպես օրինակ՝ որպես կարևորագույն փաստաթուղթ նա վկայակոչում է «Դիվան Խ. Աբովյանի» առաջին հատորի 193-րդ էջում հրատարակված, 1853 թ. կազմված, Աբովյանի ծառայության ցուցակը և գրում. «էմիլիա Աբովյանը ծառայության ցուցակը ներկայացնելիս նշում է, որ Աբովյանը անհետացել է 43 տարեկան հասակում: Իսկ քանի որ Խ. Աբովյանի անհետացման թվականը մեզ հայտնի է, ուստի 1848-ից հանելով 43-ը, կստանանք 1805 թվականը»⁷:

Այստեղ առկա են մի քանի անճշտություններ: Նախ՝ ծառայության ցուցակը էմիլիան չի ներկայացրել, քանի որ նա այդ իրավունքը չի ունեցել: Երրորդ օրենքներով դիմումը ներկայացնելուց հետո մյուս անհրաժեշտ փաստաթղթերը կազմում էին բարձրագույն իշխանությունները և իրենք էլ ներկայացնում ուր հարկն է⁸: Այնուհետև, ծառայության ցուցակում նշված «քառասուններե տարեկանը» վերաբերել է ոչ թե 1848 թ. անհայտացման ժամանակին, այլ ցուցակը կազմելու տարեթվին՝ 1853 թ.: Ուրեմն ոչ թե 1848-ից պետք է 43-ը հանվի՝ այլ՝ 1853-ից, որի դեպքում ստանում ենք ոչ թե 1805, այլ 1810 թ.:

Ուղիղ քսան տարի հետո՝ 1968 թ. Աբովյանի ծննդյան թվականը վիճաբանության նոր ալիք բարձրացրեց: Այս անգամ բանավիճողը բանասեր Պիոն Հակոբյանն էր, որը քննադատեց պրոֆ. Գ. Աբովի առաջարկած թվականի անհիմն լինելը և վերակենդանացրեց 1809 թ.: Միության տարբեր արխիվներից (Լենինգրադ, Մոսկվա, Տարտու, Թբիլիսի, Երևան), Աբովյանի երկե-

⁵ Տե՛ս «Խաչատուր Աբովյան. դրական-բանասիրական հետազոտություններ», գիրք երրորդ, Երևան, 1948, էջ 207:

⁶ Տե՛ս նույն տեղում, էջ 207—209:

⁷ Նույն տեղում, էջ 211—212:

⁸ Տե՛ս Свод законов Российской империи (изд. 1842 г.), т. 3, Устав о пенсиях и единовременных пособиях, приложение к статье 173, «Формы спискам сведений, представляемых начальниками губерний министерству юстиции при испрошении пенсии и пособий». Այսուհետև ամենուր վկայակոչվելու է օրենքների ժողովածուի 1842 թ. հրատարակությունը:

րից, պաշտոնական վավերագրերից ու ժամանակակիցների վկայություններից մեծ ժրաջանությամբ Աբովյանի ծննդյան թվականի վերաբերյալ փաստերի հավաքման տեսանկյունից Հակոբյանի ուսումնասիրությունը գերադանցում է իր բոլոր նախորդներին: Նրա «Խաչատուր Աբովյան. կյանքը, գործը, ժամանակը» ծավալուն մենագրության մեջ (էջ 48—71) քննարկման են ենթարկված Աբովյանի ծննդյան թվականին վերաբերող տվյալները, դրանց հարակից ու լրացուցիչ տեղեկությունները և այլն:

Քննարկենք Հակոբյանի վկայակոչած մի շարք փաստերը:

Թիֆլիսի ռազմական նահանգապետ Ստրեկալովը Պասկևիչին գրած զեկուցագրում, 1830 թ. հունվարի 16-ին Աբովյանի մասին գրել է՝ «20-тилетный молодой человек»: Այս առաջին վկայությունից Հակոբյանը եղրակացնում է. «(20 տարեկան երիտասարդ), ուստի 1809 թ. վերջերի ծնված»⁹:

Մեր կարծիքով փաստից արված եղրակացությունը սխալ է: Հայտնի է, որ Աբովյանի ժամանակ առհասարակ ծննդյան թվականի մատնանշում չկար: Պաշտոնական բոլոր փաստաթղթերում տարիքի մասին հարցադրումը ձևակերպված էր «лета от роду» ձևով, այսինքն՝ տարիքը ծննդյան ժամանակվանից: Այս երևույթը Հակոբյանին հայտնի է, և նա ճիշտ կերպով բացատրում է. «Երբ ասվում էր, որ մեկն, ասենք, 21 տարեկան է, ապա նշանակում էր, որ նրա 21 տարին արդեն լրացած է»¹⁰:

Ասել է թե, այսպիսի ընդհանուր հաշվումների պայմաններում տարիքի որոշման վճռական դերը տարեվերջն ու տարեսկիզբն էին, այսինքն՝ եթե 1829 թ. դեկտեմբերին տվյալ անձը ծննդյան ժամանակվանից հաշված 19 տարեկան էր, ապա 1830 թ. հունվարին նա արդեն 20 տարեկան էր հաշվում, քանի որ ծննդյան ամիս ու ամսաթիվ գոյություն չունեն: Այս առումով 1830 թ. հունվարի 16-ին հայտնված «20-ամյա երիտասարդի» ծննդյան թվականը կստացվի 1810 թ. և ոչ թե՝ «1809 թ. վերջեր»¹¹:

Երկրորդ փաստարկը 1830 թ. փետրվար-մարտ ամիսներին Նիկոլայ I-ին Աբովյանի գրած խնդրագրում «Հասակ իմ քսանամյա գոլով» վկայությունն է, որից Հակոբյանը եղրակացնում է. «ուստի՝ 1809 թ. վերջերի ծնված»¹²: Իրականում մենք գործ ունենք 1810 թ. հետ:

Երրորդ փաստարկը Աբովյանի մասին Ֆ. Պարրոտի 1830 թ. մարտի 3-ին գրած կարծիքի մեջ «20-ամյա երիտասարդ» վկայությունն է, որից Հակոբյանը եղրակացնում է. «ուստի՝ 1809 թ. վերջերի ծնված»¹³: Սակայն այս փաստարկը դարձյալ 1810 թ. օգտին է խոսում:

Ֆ. Պարրոտն իր «Ուղեորություն դեպի Արարատ» գրքում նկարագրելով 1829 թ. սեպտեմբերի 27-ին Արարատի գագաթ բարձրանալը, Աբովյանի մասին գրել է. «սարկավաղը, թեև հազիվ 20 տարեկան»¹⁴:

Այս վկայությունից Հակոբյանը եղրակացնում է. «ուստի ծնված 1809 թ. հոկտեմբեր ամսից ոչ առաջ»: Այնուհետև նա գրում է. «Իր հնությամբ Աբով-

9 Պ. Հակոբյան, Խաչատուր Աբովյան, Երևան, 1967, էջ 53: Տարեթվերի բոլոր ընդգծումները հեղինակինն են:

10 Նույն տեղում, էջ 52:

11 Տե՛ս նույն տեղում, էջ 53:

12 Նույն տեղում:

13 Նույն տեղում:

14 Նույն տեղում:

յանի տարիքը մատնանշող այս առաջին վկայությունից մի եզրակացություն կարելի է հանել, այն էլ՝ խիստ ծանրակշիռ. իս. Աբովյանը, անպայմանորեն ծնված պետք է լինի 1809 թ. աշնանը, հոկտեմբեր ամսից ոչ առաջ, քանի որ, Պարրոտի վկայությամբ՝ սեպտեմբերի 27-ին նրա 20 տարին դեռ լրացած չէր (ինչպես հետո կտեսնենք, այս թվականն ամենաճիշտն է)։ Մենք ոչ մի հիմք և իրավունք չունենք չհավատալու Ֆ. Պարրոտին, քանի որ նա իր տվյալները քաղել է անձամբ Աբովյանից, իսկ վերջինս 1829 թ. իր տարիքը պետք է որ ավելի լավ իմանար, քան նրանից հարյուր տարի հետո եկող գիտունները»¹⁵։

Բայց միթե պարզ չէ, որ եթե 1829 թ. սեպտեմբերի 27-ին Աբովյանի «20 տարին դեռ լրացած չէր», ապա այդ թվականին Աբովյանը 19 տարեկան էր, իսկ դա նշանակում է, որ նա ծնվել է 1810 թ. և ոչ թե 1809 թ. աշնանը։

Բանասերը այնուհետև գրում է. «Խնդամիտ ղզացմունք» բանաստեղծությունն, օրինակ, լեզույն Աբովյանի վկայությամբ հորինված է 1826 թ. «ի վեշտասան հասակի իւրում», որ նշանակում է, թե 1826 թ. Աբովյանն իրեն սասնվեցամյա պատանի է համարել, հետևապես ծնված՝ 1809 թ. վերջերին կամ 1810 թ. սկզբներին, և իրականում էլ այդպես է, բայց այս վկայության վրա չենք հենվի, որովհետև մեր մասնավոր հետազոտությունները պարզել են, որ այդ ոտանավորը 1828 թ. առաջ չէր կարող գրված լինել»¹⁶։ Մերիշ խոսքով՝ Աբովյանի վկայությունը ճիշտ չէ և այս դեպքում «հիմք ու իրավունք ունենք չհավատալու» նրան։ Ավելորդ է ասկածամտություն։ Չէ՞ որ Հակոբյանը նույն տողերից հինգ էջ առաջ, իր 13-րդ փաստարկում, հենվելով Աբովյանի այդ վկայությանը, ճիշտ եզրակացություն էր հանգել՝ «Ուստի 1810 թ. ծնված»¹⁷։

«Խնդամիտ ղզացմունք» բառերով սկսվող բանաստեղծությունն Աբովյանը նվիրել է կոմս Պասկևիչին, որտեղ նրան «Հայր Հայաստանի», «արևմեր ազգի» է կոչում, իսկ հետագայում այն անվանել է իր «այն ժամանակվա ղզացումների մանկական թոթովանքներ» և, միաժամանակ վկայել, որ ինքը այդ բանաստեղծությունը իր մոտ պահում է որպես սրբություն¹⁸։

Հիրավի, Աբովյանի արխիվում պահպանվել են այդ բանաստեղծության շուրսից ավելի օրինակներ, որոնցից երկուսը Աբովյանի գեղեցիկ ձեռագրով վերնադրված է՝ «Խնդամիտ ղզացմունք երախտագետ հայկազնո վասն աղասութեան հայրենեաց իւրոց ասացեալ յԵրևան յամի 1826 ի վեշտասան հասակի իւրում»¹⁹, իսկ մյուս՝ 1831 թ. փետրվարի 1-ին արտագրած օրինակի վրա «ասացեալ» բառից հետո ավելացրել է՝ «ի նոյն իսկ յԵրևան յամի 1826 ի վեշտասան հասակի իւրում»²⁰, որ նշանակում է դարձյալ Երևանում ասված կամ գրված։

Արարատի գաղաթը բարձրանալու կապակցությամբ Շուպենի սկսած բանավեճի պատճառով, 1831 թ. օգոստոսի 18-ին, Դորոպատի գավառա-

¹⁵ Նույն տեղում, էջ 60։

¹⁶ Նույն տեղում, էջ 59, տողատակ։

¹⁷ Նույն տեղում, էջ 54։

¹⁸ Տե՛ս հիշ, հատ. 10, էջ 258։

¹⁹ Ե. Չարենցի անվ. զրականության և արվեստի թանգարան, իս. Աբովյանի արխիվ, № 55, էջ 77։

²⁰ Նույն տեղում, № 81։

յին դատարանում վկայություն է տալիս նաև Աբովյանը: Հարցաքննության ժամանակ իր տարիքի մասին նա պատասխանում է, որ քսաներկու տարեկան է: Բայց տուն գնալուց հետո նորից դատարան է վերադառնում և հայտարարում, որ ինքը 21 տարեկան է, ուստի՝ 1810 թ. ծնված: Այդ մասին կազմված դատարանի արձանագրությունը ՍՍՀՄ կենտրոնական պատմական օրինակից առաջինը Պ. Հակոբյանն է հայտնաբերել և «Պատմա-բանասիրական հանդեսի» 1960 թ. № 2-ում (էջ 104) գրել, որ Աբովյանի հարցաքննությունը տեղի է ունեցել 1831 թ. օգոստոսի 18-ին: Բայց ահա իր փաստարկների 4-րդ կետում իրական փաստը մեկ տարով «փոքրանում» և դառնում է 1830 թ. օգոստոսի 18:

Մյուս փաստարկը 1830 թ. Դորպատում կազմված հարցաթերթիկն է, որտեղ Աբովյանը վկայել է, որ վանք է տարվել ինը տարեկան հասակում, այնտեղ մնացել վեց տարի, Թիֆլիսում սովորել մեկուկես տարի և երեք տարի ա՛նց հանդիպել Պարոտին: Սրանից Հակոբյանը հաշվումներ է անում և Պարոտին հանդիպման տարվանից՝ 1829-ից 19,5 հանելով, ստանում 1809 թ. վերջերին կամ 1810 թ. սկզբներին ծնված: Եթե 1809 թ. վերջերին ծնված լինելը մի կերպ հասկանալի է, ապա «1810 թ. սկզբներին» լրիվ անհասկանալի է, որովհետև հոկտեմբերի 15-ը երբեք տարվա սկիզբ չի համարվել:

Պնդելով, թե իր բերած 44 վկայություններից 26-ը (այսինքն՝ ճնշող մեծամասնությունը) աներկբայորեն հաստատում են, որ Աբովյանը ծնվել է 1809 թ., այդ թվականին նախապատվություն տալու համար Հակոբյանը այնուամենայնիվ հարկ է համարել ընդհանուրից անջատել շորս «ամենաճանրակշիռ» վկայություններ և ընդգծել դրանք²¹: Չորսից երկուսի մասին վերը խոսվեց: Մյուս երկու վավերագրերի անջատումն ու ընդգծումը իբրեւ 1809 թ. հաստատող փաստարկներ, նույնպես կասկածելի են, քանի որ ընդհանուր փաստարկներում իր կողմից ընդունված և որոշակիորեն 1810 թ. օգոստիս խոսող 10-րդ վկայության մասին այստեղ ասված է. «ուրեմն՝ ծնված պարձյալ 1809 թ. վերջերից ոչ առաջ, թերևս 1810 թ. սկզբներին», իսկ հարձյալ որոշակիորեն 1810 թ. օգոստիս խոսող 35-րդ վկայության մասին նա գրել է. «Ըստ այդ վավերագրերի՝ անհայտացման ժամանակ, այսինքն՝ 1848 թ. ապրիլի 2-ին. Աբովյանը եղել է 38 տարեկան, իսկ դա նշանակում է, որ ծնված է եղել 1809 թ. վերջին ամիսներին, կամ 1810 թ. սկզբներին, բայց ոչ երբեք դրանից առաջ»²²: «1809 թ. վերջերին կամ 1810 թ. սկզբներին» ձևակերպումը կարող է միայն մի դեպքում ճիշտ լինել՝ եթե ստույգ հայտնի է, որ Աբովյանը ծնվել է 1809 թ. դեկտեմբերի վերջին օրերին և առկա է հին ու նոր տոմարների տարբերությունը: Բայց այդ մասին գրավոր վկայություններ չկան:

Աբովյանի ժամանակ երկրում մտցված էր անձնագրային համակարգ, ըստ որում, տարիք ապացուցող անժամկետ անձնագիր տրվում էր ոչ բոլորին, այլ պետական ծառայության մեջ գահի հանդեպ հավատարմություն ցուցաբերածներին: Այդ իմաստով անձնագիրը հանդիսանում էր ոչ միայն

21 Տե՛ս Պ. Հակոբյան, նշվ. աշխ., էջ 59—63:

22 Նույն տեղում, էջ 63:

քաղաքացու ինքնությունը, ազգությունը, զբաղմունքը, ընտանեկան դրու-
թյունը ապացուցող հիմնական փաստաթուղթ, այլև միապետի հանդեպ ցու-
ցաբերած հավատարիմ հպատակի բնութագիր: Անժամկետ անձնագիրը
տրվում էր տվյալ ծառայողի անմիջական պետի կողմից, որպես ծառայու-
թյան մեջ մտնելու ժամանակ հանձնված բոլոր փաստաթղթերին փոխարի-
նող վկայական: Այդ փաստաթուղթը կոչվում էր վկայագիր կամ անժամկետ
անձնագիր (аттестат или бессрочный паспорт), որով ստացողին, այ-
սինքն՝ վկայագրվածին, ատեստավորվածին, իբրև փորձված, հավատարիմ
անձի, իրավունք էր տրվում կայսրության ցանկացած վայրում բնակ-
վել: Այդպիսի անձնագիրը աստիճանավորներին էր տրվում ծառայությունից
ազատման իսկ ժամանակ կամ այլ գործի անցնելու կապակցությամբ²³:

Անժամկետ անձնագիրը կամ վկայագիրը միաժամանակ ծառայում էր որ-
պես ստացողի ու նրա ընտանիքի ազնվականական իրավունքները ապացու-
ցող, երեխաներին գիմնազիաներում ու բուհերում սովորելու արտոնություն
տվող, թոշակ ստանալու և ազնվականներին արտոնված այլ իրավունքներ
ապացուցող փաստաթուղթ:

Իսկ ի՞նչ կարգ էր սահմանված նրանց համար, ովքեր չէին վկայագրվում
(ատեստավորվում): Օրենքը չվկայագրված աստիճանավորների ու նրանց ըն-
տանիքների համար հիմնական փաստաթուղթ էր սահմանել ծառայության
ցուցակը: Այդ պատճառով էլ ծառայողի ընտանիքը, որպես թոշակ ստանալու
վկայական, պետք է ներկայացներ կամ աստիճանավորի վկայագիրը, կամ նրա
մահվան վկայականը և կամ ծառայության ցուցակը²⁴: Այսպիսի կարգի պայ-
մաններում ծառայության ցուցակի առկայությունն իսկ, առանց լրացուցիչ
տեղեկությունների, տվյալ պաշտոնյային հայտնի էր դարձնում, որ ինքը գործ
ունի չվկայագրված աստիճանավորի կամ նրա ընտանիքի հետ:

Աբովյանին վերաբերող պաշտոնական բոլոր փաստաթղթերում (այդ
թվում և ծառայության ցուցակներում) գրված է, որ նա ազատվել է իր զբա-
ղեցրած ուսուցչի և հասարակական տեսչի պաշտոններից: Դործող օրենքներով
սա նշանակում էր, թե նա ծառայությունից չի ազատվել, այլ միայն պաշտո-
նից, և նրա անմիջական ղեկավարությունը իրավունք ուներ նրան այլ տեղ
ծառայության ուղարկելու: Այս է եղել պատճառը, որ թեև 1848 թ. մարտի 9-ին
Աբովյանին ուղարկված ազատման ծանուցագրում նրա անմիջական պետ,
փոխարքայության ուսումնական մասի կառավարիչ Սեմյոնովը գրել է, թե իբր
նրան ազատում է ծառայությունից, բայց օրենքով նախատեսվող վկայագիր
չի ուղարկել Աբովյանին: Ահա թե ինչու այդ գրությունը ստանալուց հետո
(մարտի 15-ից) Աբովյանն ընկել է հոգեկան տանջանքի մեջ և թախիժը պա-
տել է նրան²⁵: Զէ՞ որ աշխատանքից ազատելու պատրվակը նրան Ռիֆլիսի
ներսիսյան դպրոց փոխադրելն էր, որի դեպքում նույնպես պարտագիր էր վկա-
յագրի ուղարկումը, եթե, իհարկե, նա վկայագրված էր համարվում: Վկայագիր
չստանալու փաստից Աբովյանը հասկացիլ էր, որ ինքը եթեկա է պատժի
և հենց այդ պատճառով էլ ընկել էր մտատանջության մեջ:

²³ Մանրամասնությունները տե՛ս Свод законов, т. 3, Устав о службе по определе-
нию от правительства, статья 1395 և հտ.:

²⁴ Տե՛ս Свод законов, т. 3, Устав о пенсиях и единовременных пособиях, статья 156.

²⁵ Տե՛ս Էմիլիա Աբովյանի վկայությունը, և՛ Աբովյանի արխիվ, № 593: Հմմտ. «Դիվան
Խ. Աբովյանի», հատ. 2, Նրևան, 1948, էջ 267:

Ալվելին, հետագայում, «անհայտանալուց» հետո, երբ խնամակալները Բուրքեստանովի միջոցով 1848 թ. նոյեմբերի 6-ին Բիֆլիսի բարձրագիր իշխանություններից պահանջել են Աբովյանի վկայագիրը²⁶, դրա փոխարեն նրանց ուղարկվել է, ուսումնարանների դիրեկտորի կողմից վավերացված, Աբովյանի 1848 թ. ծառայության այն ցուցակը, որ նրա ժառանգներից Վիկտորյա Աբովյանը հանձնել է գրականության ու արվեստի թանգարանին (պահվում է լրացուցիչ ցուցակով, 85 թվահամարի տակ): Բացի ծառայության այս ցուցակից, կան նաև երկու այլ պատճեններ, որոնք հանվել են Բիֆլիսի դիրեկցիայում պահվող՝ Աբովյանի ծառայության իսկական ցուցակից և հաստատվել Անդրկովկասյան ուսումնարանների դիրեկցիայի կողմից:

Աբովյանի ծննդյան թվականի ճշտման տեսակետից, վավերացված այս պատճեններից յուրաքանչյուրի դերը անգնահատելի է հետևյալ առումով:

Նշվեց, որ աստիճանավորին վկայագիր տալով այլևս նրան չէր վերադարձվում ծառայության մեջ մտնելու ժամանակ պահանջվող և նրա կողմից ներկայացված ոչ մի փաստաթուղթ: Ասացինք նաև, որ վկայագրին հոխարինում էր ծառայության ցուցակը: Իսկ օրենքով ծառայության մեջ մտնելու ժամանակ կրթության և այլ փաստաթղթերից բացի պահանջվում էր նաև շափաբերական մատյաններից գրավոր վկայական տարիքի մասին, ավելի ստույգ՝ ծննդյան ժամանակի կամ թվականի մասին²⁷: Այս օրենքը Պետական կոմիտեի կողմից ընդունվել էր 1831 թ. հունվարի 31-ին, իսկ 1835 թ. հոկտեմբերի 7-ին նույն կոմիտեն ընդունել էր մի օրենք ևս, որ այն անձինք, ովքեր ծնվել են 1831 թ. հունվարի 31-ից առաջ և հնարավորություն չունեն շափաբերական մատյաններից գրավոր վկայական բերել, պետք է այդպիսիք բերեն խոստովանեցման գրքերից: Մի խոսքով, օրենքը ծառայության մեջ մտնողից պարտադրաբար գրավոր վկայական է պահանջել իր ծննդյան թվականի կամ տարիքի մասին²⁸:

Հայտնի է, որ Աբովյանը ծառայության է մտել 1837 թ. փետրվարի 12-ին: Ուրեմն այդ թվականին էլ Անդրկովկասյան ուսումնարանների դիրեկցիայում կազմվել է նրա ծառայության իսկական այն ցուցակը, որից հետագայում վավերացված պատճեններ են հանվել: Իսկ այդպիսի ցուցակ կազմելը պարտագիր է եղել, քանի որ դիրեկցիայից բացի նոր աստիճանավորության մեջ մտնողի մասին ծառայության ցուցակներ պետք է ուղարկվեին նաև հերոլդիային՝ ազնվականության շարքը դասելու համար (1846 թ. հետո հերոլդիայի փոխարեն ուղարկվում էին հրահանգչական դեպարտամենտ), լուսավորության մինիստրության դեպարտամենտին, արդարադատության և ֆինանսների մինիստրություններին:

Որ 1837 թ. դիրեկցիայում կազմված Աբովյանի ծառայության իսկական ցուցակում, խոստովանեցման մատյանից (քանի որ շափաբերականից լինելու

²⁶ Տե՛ս ՀՊԿՊԱ, ֆ. 1, ց. 1, գ. 1726, թ. 22:

²⁷ Տե՛ս Свод законов, т. 3, Устав о службе по определению от правительства, статья 394.

²⁸ Այսպես, Նղնախի գավառական ուսումնարանի ուսուցիչ Իվան Ակիրինսկին 1837 թ. ծառայության ընդունվելու ժամանակ մյուս փաստաթղթերի հետ ներկայացրել է նաև ծննդյան ու մկրտության մասին վկայական (տե՛ս ՀՊԿՊԱ, ֆ. 2, ց. 1, գ. 4864, թ. 41), իսկ ուսուցիչ Ֆիլիսոնովից շափաբերական մատյանից վկայական պահանջելու վերաբերյալ 1842 թ. 23 թերթյանոց գործ է ստեղծվել (տե՛ս ՀՊԿՊԱ, ֆ. 422, գ. 19332, լջ 22ա, № 247):

դեպքում ինքը ստույգ կիմանար) նրա բերած գրավոր վկայականի հիման վրա նրա ծննդյան տարեթիվը գրված է եղել 1810 թ., ապացուցվում է նաև այն փաստով, որ նույն 1837 թ. սեպտեմբերին գրված Անդրկովկասյան ուսումնարանների տարեկան հաշվետվության մեջ Աբովյանի տարիքի դիմաց գրված է «27 տարեկան»: Այստեղ սխալվելն ու թյուրիմացությունը բացառվում են, որովհետև որ թվականին նա մտել է ծառայության մեջ, այդ տարին էլ գրվել է հաշվետվությունը:

1810 թ. անկասկածելի է նաև այն առումով, որ իսկական ծառայության ցուցակից հանված և վավերացված երեք պատճեններն էլ միաձայն այդ թվականն են հաստատում: Աբովյանի ծառայության իսկական ցուցակը չունենալու պատճառով, վավերացված այդ պատճեններից յուրաքանչյուրը բնագրի արժեք է ստանում: Ահա այս պատճեններից երկուսը, իբրև թե իրար կրկնող: Հակոբյանը տեղավորել է իր փաստարկների 35-րդ կետում:

Պատճեններից առաջինը, ինչպես վերը նշեցինք, Աբովյանի վկայագրի փոխարեն Թիֆլիսից նրա երեսանների խնամակալներին ուղարկվածն է, որ պետք է եղել հենց խնամակալական գործերի համար: Երկրորդ պատճենի լուսանցքում գրված է՝ «№ 1600», իսկ ներքևում կարդում ենք. «Копия сего формулярного списка, во всем прописанном с подлинным таковым, имеющимся при делах Тифлисской дирекции училищ, верна и следствие прошения жены коллежского ассессора Эмилии Абовьян, от 31 августа 1854 г. выдана ей для представления начальству Закавказского девичьего института при определении в оной дочери ее Аделанды (Зармане), в том подписал и приложением казенной печати удостоверяю. Г. Тифлис, сентября 7 дня 1854 г. Директор училищ Тифлисской губернии статский советник (подпись)»²⁹.

Այժմ վերընթեռնենք Հակոբյանի 35-րդ փաստարկը: Այնտեղ ասված է. «Աբովյանի անհայտացումից հետո՝ 1848 թ. կազմված ծառայության ցուցակը: Նշված է, որ անհայտացման ժամանակ Աբովյանը եղել է «38 лет», ուստի 1809 թ. վերջերին ծնված: Այդ ցուցակից 1854 թ. օգոստոսի 31-ին հանված պատճենը ևս կրկնում է նույնը՝ «Тридцати восьми лет» (38 տարեկան) կամ 1809 թ. վերջերի ծնված»³⁰:

Սույն փաստարկի մեջ բացահայտ անճշտություն կա: Նախ՝ առաջին ցուցակը ոչ թե 1848 թ. է կազմվել, այլ բնագրից 1848 թ. հանված պատճենն է, որի տակ պարզ գրված է. «Верно с подлинником, исправляющий должность директора Зайцев (подпись)»³¹. Երկրորդ, 1854 թվականին ոչ թե այդ պատճենից հանված պատճենն է, այլ՝ Թիֆլիսյան ուսումնարանների դիրեկցիայում պահվող 1848 թ. կազմված ծառայության ցուցակի, ըստ որում, պատճենը հանվել է ոչ թե օգոստոսի 31-ին, այլ՝ այդ օրը էմիլիա Աբովյանի դրած դիմումի հիման վրա 1854 թ. սեպտեմբերի 7-ին: Վերջապես, 1848-ից հանած 38=1810:

Սակայն անցնենք Աբովյանի ծառայության ցուցակի այն բնագրին, որը վերոհիշյալ պատճենների հիմքն է եղել: Հիշադրի, որտեղ այն կարող է լինել:

Պատճեններից մեկից տեղեկանում ենք, որ այն պահվելիս է եղել Թիֆ-

²⁹ Խ. Աբովյանի արխիվ, № 86:

³⁰ Պ. Հակոբյան, նշվ. աշխ., էջ 57:

³¹ Խ. Աբովյանի արխիվ, № 85:

լիսյան ուսումնարանների դիրեկցիայում: Քանի որ նախկին Անդրկովկասյան ուսումնարանների դիրեկցիայի գործերը հանձնվել են նորաստեղծ թիֆլիսյան դիրեկցիային, ապա, հավանաբար, այստեղ են պահվելիս եղել նաև Աբովյանին վերաբերող փաստաթղթերը:

Վրաստանի կենտրոնական պատմական արխիվում պահվում է տարբեր դավառական ուսումնարանների դիրեկցիաներին պատկանող 1838—1858 թթ. գործերի մի ցուցակ: Դրա 525 թվահամարի տակ գրված է. «Գործ N 72. Երեւանի դավառական ուսումնարանի հաստիքավոր տեսուչ, անհայտ կորած Աբովյանի, Թուրքեստանովին տեսչի պաշտոնակատար նշանակելու և սույն ուսումնարանի համար կահույք պատրաստելու մասին»: «Թերթերի քանակը» սյունակում գրված է. «105», «նշումներ» սյունակում՝ «Ոչնչացնել»³²:

Սա միակ ուղղակի վկայությունն է այն մասին, որ Աբովյանի «անհայտացման» վերաբերյալ 105-թերթանոց և 72 համարով «Գործ» է եղել ստեղծված, որը 1858 թ. ոչնչացվել է: Չպետք է մոռանալ, որ 1858 թ. լրացել էր Աբովյանի «անհայտացման» 10 տարին: Քաղաքացիական օրենսգրքի հոդվածներից մեկը սահմանում էր, որ եթե անհայտ բացակայողը մինչև տաս տարին լրանալը հայտնվում և ապացուցում է սեփականատիրական իր իրավունքները, ապա դրանք տրվում են իրեն: Հաջորդ հոդվածը սահմանում էր, որ ով տասնամյա ժամկետում չի հայտնվում ժառանգությունը ստանալու համար, ապա նա ընդմիշտ զրկվում է դրանից³³:

Զի՛կարելի արդյոք ենթադրել, որ Աբովյանի «անհայտացման» մասին 105 թերթանոց «Գործը» տաս տարի պահպանվել, ապա և տասը տարին լրանալուց հետո ոչնչացվել է՝ անհայտ բացակայողներին վերաբերող սույն հոդվածների հիմունքներով:

Մեր կարծիքով անկասկած է, որ Աբովյանի ծառայության իսկական ցուցակը, որից հետագայում պատճեններ են հանվել, եղել է հենց այդ ոչնչացված «Գործում»:

Եվս մի փաստ: Դա նույնպես վերաբերում է Աբովյանի տարիքին: Ինչո՞վ բացատրել այն հանգամանքը, որ ընտանիքին թոշակավորելու կապակցությամբ ներկայացված ծառայության ցուցակի պատճենի մեջ 1853 թ. Աբովյանի տարիքը գրվել է 43, իսկ 1854 թ. հանված պատճենի մեջ՝ 38: Կարծում ենք, որ դրա բացատրությունը պատճեններից յուրաքանչյուրի պահանջման նպատակի մեջ է, այսինքն՝ թե ինչ նպատակով է հանվել այս կամ այն պատճենը:

1854 թ. պատճենը հանվել է Աբովյանի դստեր՝ 11-ամյա Աղելաիդա-Ջարմանդուխտին Անդրկովկասյան օրիորդաց ինստիտուտ ընդունելու անհրաժեշտությամբ: Այդ նպատակի համար պետք են եղել տեղեկություններ միայն երեխայի ազնվականական կացության, ծննդյան վկայականի և մկրտության մասին: Քանի որ պահանջվող բոլոր տեղեկություններն էլ եղել են Աբովյանի 1848 թ. ծառայության ցուցակում, այդ պատճառով էլ հանվել է դրա պատճենը: Աբովյանի տարիքի մասին տեղեկությունը տվյալ առիթով պետք չի եղել:

32 Տե՛ս ՎղկոյԱ., ք. 422, գ. 19532, թ. 52ա:

33 Свод законов, т. 10, статья 1027, 1028.

Այլ է թոշակ կամ միանվագ նսպատ տալու հարցը, որտեղ պահանջվել է բոլոր տեղեկությունների խիստ ստուգություն: Չէ՞ որ բաղառիկ բնույթի հետեանքով, բարձրագույնին ներկայացնելուց առաջ, Աբովյանի ընտանիքի թոշակավորման բոլոր փաստաթղթերը պետք է ստուգման ներկայացվեին լուսավորության մինիստրությանը, իսկ մինիստրների կոմիտե մտցնելուց առաջ՝ արդարադատության և ֆինանսների մինիստրություններին: Ավելացնենք նաև, որ հենց արդարադատության մինիստրությանը ներկայացվող տեղեկությունների ծանոթագրության մեջ է պահանջվել, որ ծառայության ցուցակում տարիքի մասին պետք է նշել «сколько имел лет от роду в день его смерти».

Ահա այսպիսի պայմաններում կազմված Աբովյանի 1853 թ. ծառայության ցուցակի պատճենի մեջ նրա տարիքի մասին գրված է «բառասուն երեք տարեկան»:

Իր հավաստիության ու ստուգության բնույթով միայն այս վկայությունը բավարար է ասելու, որ Աբովյանը ծնվել է 1810 թ.:

ГОД РОЖДЕНИЯ ХАЧАТУРА АБОВЯНА

В. Дж. ГАЗАРЯН

(Резюме)

Вопрос о дате рождения Х. Абовяна до сих пор считается спорным вследствие того, что церковные метрические книги села Канакер, где родился писатель, не сохранились. Кроме того, в 1858 г. было уничтожено «Дело № 72» из 105 листов, содержавшее документы, относившиеся к службе Абовяна, в числе которых, по всей вероятности, находилось и письменное свидетельство о его рождении. В статье утверждается, что дошедшие до нас три заверенные копии формулярного списка Абовяна (подлинник которого, должно быть, находился в уничтоженном «Деле № 72»), каждая из которых может заменить оригинал, свидетельствуют, что Абовян родился в 1810 г.